

Miho calidad di bida cu chens pa sigui ricibi kimoterapia of cirugia

Pa prome biaha pacient ta ricibi stent colorectal na Hospital



ORANJESTAD (AAN): Tres siman pasa e prome pacient a ricibi un stent colorectal na Aruba y e procedura tabata uno masha exitoso segun e team di gastroenterologia di dr. Horacio E. Oduber Hospital.

Dr. Edgar Caceres y dr. Jreige cu ta e gastroenterologonan di Dr. Horacio E. Oduber Hospital ta trahando hunto cu e departamento di oncologia pa yega na miho cuido y tratamento pa pacientnan di cancer di colon na Aruba. E specialistanan ariba menciona y nan coleganan di Departamento di oncologia ta pone hopi enfasis riba calidad

di bida di nan pacient y pa cu esaki a studia e posibilidad pa introduccion di diferente tratamiento paliativo cu por worde haci na Aruba mes. Ta importante pa menciona cu e pacient cu a ricibi e stent y su curpa a bira mas fuerte tin mas chens pa sigui ricibi por ehempel kimoterapia of cirugia despues.

Un keho cu un pacient di cancer di colon por tin ta obstruccion di tripa causa pa crecimiento di tumor. E obstruccion ta haci imposibel pa e pacient bay af, e pacient ta debilita cual tin como consecuencia cu su tratamento di kimoterapia of cirugia no

por tuma luga. Introduccion di un stent colorectal, pues den e tripa/intestino, ta un di e formanan menos invasivo, mas eficiente y comodo pa asina brinda alivio na e pacient.

E procedura di introduccion di un stent no ta rekeri cirugia y tin un duracion entre 40 minuut pa un ora. E ta un procedura lihe y sigur, segun dr. Jreige. E pacient no ta sinti e presencia di e stent den su curpa, pero siguramente ta sinti e alivio cu esaki ta trece cune. E recuperacion ta umbes y den mayoria caso e pacient no mester keda interna despues di e introduccion. E por bay cas di biaha cu instruccionnan di su especialista pa loke ta trata control y cuido, tratamiento di dolor y nutricion.

Un stent colorectal ta un tubo masha chikito di metal special cirurgico cu ta parce "kippenaas". E ta worde introduci na e luga cu ta obstrui den e pacient su tripa pa medio di un colonoscopia cu ta worde haci na Departamento di endoscopia. Ta posibel cu e ta worde introduci via di un endoscopia tambe. E diseño di e stent ta haci posibel cu e ta completamente cera na momento di introduccion y e ta expande den e tripa pa pusha habri e tripa y asina haci posibel cu e pacient por bay af atrobe. Esaki ta un tratamiento paliativo, pues e no ta cura e cancer di colon pero si e ta haci posibel pa e pacient por come, por bay af y asina bira mas fuerte pa un miho calidad di bida. Por kita e stent ora no mester di dje mas.

Dr. Jreige ta comenta cu antes tabata rekeri cirugia pa haci un bypass of otro procesonan incomodo y di recuperacion largo pa e pacient por haya alivio, pero e introduccion di un stent ta miho pa e pacient.

Asina Dr. Horacio E. Oduber Hospital ta sigui desaroya y ta innovativo pa implementa un miho cuido y calidad di bida pa e pacient y cumpli cu e lema cu e pacient ta central.



**Telefonnan
di DIARIO**

Tel: 582 2239

Fax: 582 8551